

2007

ORGOSOLO S' ASSUNTA

14 agosto 2007

POETAS:

MASALA MARIO

MUREDDU CELESTINO

FARINA NICOLA

1° TEMA: AMORE PRO SA PATRIA

AMORE PRO SA FAMIGLIA

AMORE A DEUS

2° TEMA: PRETENDENTE ETZU E RICU

GIOVANA AJANA

PRETENDENTE GIOVANU E
POBERU

RIMAS A BOLU VOLUME 7

POETAS IMPROVVISADORES



ORGOSOLO

S' ASSUNTA

14 agosto 2007

POETAS:

MASALA MARIO

MUREDDU CELESTINO

FARINA NICOLA

1° TEMA: AMORE PRO SA PATRIA

AMORE PRO SA FAMIGLIA

AMORE A DEUS

2° TEMA: PRETENDENTE ETZU E RICU

GIOVANA AJANA

PRETENDENTE GIOVANU E

POBERU

Gara Orgosolo

accompagna tenore funtana Ona

1. Farina (esecuzione 57'')

cuasi un annu che at passadu
dae cudda ultima aberta 'e lara,
ocannu m'intendo onoradu
ca de nou bonde miro in cara,
foltzis est Maria chi at pensadu
a che esser deo como in custa gara.
E in sa chi tenzo de modesta oghe
saludo sos de fora e sos de innoghe.

2. Masala (54'')

De poeta cun su meu umile donu
chi mi lu at dadu s'ispiridu santu,
nde so fieru e mi do su antu
chi nde so possidente e so padronu
e poi chi che manchia dae tantu
oe nde torro a Orgosolo in bonu.
Dae Silanos patria e dimora
cun sos saludos pro Nostra Signora.

3. Mureddu (1'05'')

Orgosolo s'invitu a custa gara
mi onorat a mie in donzi sensu,
su piaghene chi provo est imensu
su de bos bider da su palcu in cara,
dare bos tia cherrer pro cumpensu
profundu cuntzetu e rima rara.
Intantu da cust'umile poeta
unu saludu da su coro atzeta.

4. Farina (54'')

Nessunu bi at currende pro su pannu
si a nois bi ant fatu richiesta,
isperende e non nde traere ingannu
si in su palcu bi semus nontesta,
ma pro nois est unu onore mannu
oe nde aberrere custa festa.
E nontesta pro sa gara 'e poesia
foltzis est miraculu 'e Maria.

5. Masala (52'')

A meidade de austu in su mese
pro custa festa solenne e divina
in custu palcu nde ponimos pese
che so deo, Mureddu e ch'est Farina,
e comintzamos custa gara in trese
in terras de Antonia Mesina.
E de su santu immortale Anania
però sa festa est festa pro Maria.

6. Mureddu (56'')

Ma deo veramente so cuntentu
ca onorant su nostu umile donu,
e cun custu poeticu rejonu
a dare de recreu unu momentu,
ma no est acordadu un'istrumentu
chi faghet sempre su matessi sonu.
Custu est un'istrumentu naturale
a cando sonat bene, a cando male.

7. Farina (52'')

Apeltu est de sa festa su cancellu
tando a sa gara li betamos manu,
ischides totu deo so novellu
e pro sos giovanos bi at arcanu,
ca proite deo so su piùs giovanu
e nontesta su capu drapellu.
Isperende a sa idda 'e dare cunfortu
e chi sa gara bi arrivet in portu.

8. Masala (56'')

Tue Nigola mi ses a sa dresta
e deigussu postu ti impadrone,
gai cantamos de Maria in sa festa
chi at in chelu e reina sa corona
custa mia no est una protesta
cun su tenore de Funtana Ona.
Est atonadu che una campana
no at a bessire sa gara metzana.

9. Mureddu (58'')

Si rispondet su donu naturale
za bi impignamos sa nostra favella,
si istanotte rispondet puntuale
non nos perdimos cun sa bagatella,
poi si che at poeta unu locale
sa gara za nos bessit sempre bella.
Su paesanu in palcu ponet pese
e sinde onorat totu su paese.

10. Farina (50'')

Invocare za la devo s' Assunta
custu notte pro fagher bella proa,
est dovere nontesta chi mi moa
ca in su palcu non so de atzunta,
ma tota vida so restadu a coa
e nontesta mi ana postu a punta.
E a Maria invoco dae sa zona
e chi nontesta mi la mandet bona.

11. Masala (47'')

Che so inoghe pro ti dare antos
creo Farina chi ti cumpiagas,
ma pro Maria pro santas e santos
custos annos sas garas sunu pagas,
beru istanotte inoghe ti la bragas
e sind'ana a cuntentare totu cantos.
Sos paesanos mannos e minores
ca faghes de sa domo sos onores.

12. Mureddu (57'')

Semus bestidos in umiles pannos
afrontende 'e sa gara sa pelea,
Farina as in su palcu una cadrea
e como ses contadu tra sos mannos,
e poi azumai ses vint'annos
chi ses girende in sa Sardigna intrea.
Si in sa Sardigna altzias sa oghe
as dirittu 'e l'altzare puru inoghe.

13. Farina (55'')

No isco si at forza sa pianta
ma comintzadu che apo oramai,
affronto s'allegria e su guai
no isco sa forza si est tanta,
ma Mario ses annos chimbanta
e capu non bias fatu mai.
Ca Mario Masala su silanesu
sempre a coa o setzidu in mesu.

14. Masala (45'')

Tue a s'ala dresta ti pianta
in sa patria tua o Farina,
ma ti naro sa veridade santa
cando est santa est pura e genuina,
prima dogni annu de garas noranta
nde faghia e como una trintina.
E non poto narrer viva a s'aumentu
sas garas sunt andande in fallimentu.

15. Mureddu (57'')

Nara su zustu de fronte a sa zente
ca totu s'importantzia nd'ant cumpresu,
in tota sa Sardigna ti ant intesu
prite rara virtude as in sa mente,
e Mario si setzit sempre in mesu
prite est su postu de su presidente.
No est tontu comente la ideat
sempre su menzus postu si che leat.

16. Farina (53'')

Mureddu puru già est in carrela
e a l'intender est gioga cun rie,
Mario su donu at in tutela
e mai s'infritat che su nie,
tota sa vida est sempre in lamentela
però cantende bi est dogni die.
Solu a lu pensare mi recreo
chi cantu cantas tue chi cant'eo.

17. Masala (45'')

Però su chi mi enit a bidea
como a bolu narrer za so prontu,
ca so cantende una vida intrea
e non m'intendo ancora a su tramontu,
si l'ocupo de mesu sa cadrea
za so inoghe pro bos tenner contu.
E mi at a toccare puru chi bos tente
non so in mesu ca so presidente.

18. Mureddu (56'')

Ma totu cantu ponimos in giaru
in calidade 'e improvvisadores,
custu est pro cantare logu raru
e dimustramos totu sos valores,
che mancat su chelcu cun su laru
però za che at cuadros e fiores.
Si favorint estru e fantasia
bi la agiughimos cun sa poesia.

19. Farina (55'')

Isperende sa bona parte chi fete
e a sa idda mai usare ingannu,
a nessunu in pannos de poete
dae coro mai auguro malannu,
ma su meritu a su settantasete
chi tribagliende za sunu tot'annu.
In sas cosas bellas totu a las tessere
e in sa festa bella de resessere.

20. Masala (48'')

Però rendimos a Orgosolo antos
a tie tocat onore chi ti fetas,
in biddas chi tenores chend' at tantos
cun boghes atonadas e perfetas,
e no est solu patria'e santos
custa est terra puru de poetas.
De poesia iscrita e cantada
ch'in totu sa Sardigna est fentomada.

21. Mureddu (55'')

Duncas a totastres est veru onore
in Orgosolo 'e fagher una gara,
accumpagnados de bellu tenore
chi est una cosa bella e rara,
tue Farina che improvvisadore
como su chi as de menzus ti prepara.
Rendas onore a custa dimora
su chi as de menzus lu oghes a fora.

22. Farina (48'')

Si naramos sa santa veridade
in piaga non ponzedas sos didos,
sos orgolesos tenent dignidade
ca sunt onestos e sunt bene ardidos,
est beru chi est terra de bandidos
però tenimos finas santidade.
E su poeta in palcu devotu
podimos narrer chi tenimos totu.

23. Masala (44'')

Non so poeta in sa prima ola
e ispero de no esser a declinu ,
de sa vida terrena in su caminu
ma istanotte non so a sa sola,
cando a sa dresta che tenzo a Nigola
e a manca che tenzo a Tzelestinu
Chi parzo in mesu de Pedru e de Paulu
e non mi tocat mancu su diaulu.

24. Mureddu (1'00'')

Tue ca ses poeta de alta iscola
deo so prontu a ti fagher s'inchinu,
ma no lu faghes solu su caminu
ca triulamos paris custa arzola,
ma unu azudu lu das a Nicola
unu azudu lu das a Tzelestinu.
De su comintzu 'e gara a sos congruos
nos teves azudare totas duos.

25. Farina (47'')

Marieddu za est un'ispassu
in custa isola bella bi giras,
e intesu ti ana in donzi zassu
cando su populu in sos ojos miras,
abituadu tue fis a Sassu
a Tuconi e Remundu Piras.
Però mancu nontesta ti dispones
ca nois puru tenimos sos isprones.

26. Masala (46'')

Si che sunt mortos sos poetas mannos
de so unu de sos antzianos,
in custa vida de gioias e afannos
a edade 'e settanta duos beranos,
e so cantende chimbantases annos
ma non potzo azudare sos giovanos.
E tando a manu tenta non bos leo
ca bisonzu de azudu nd'apo deo.

27. Mureddu (56'')

Est zustu sos cuntzetos chi produa
si apo estru cuntzetu e fantasia,
ma ti fato in su palcu cumpanzia
cantat donzunu cudda ottada sua,
tue as a cantare in buca tua
deo devo cantare in buca mia.
E pro me non nde tenzas oriolu
lassami istare za mi arranzo solu.

28. Farina (55'')

De ti intedere sempre apo decisu
però in su chi ti naro bene aferra,
subra su palcu nde faghimos gherra
proghì mi chelzas bene che unu fizu,
però si dare mi debes cunsizu
amentadinde daemilu in terra.
Ca subra cantamos puntuales
semus amigos contamos rivales.

29. Masala (45'')

Però cantende so dae piseddu
in garas e in festas tota vida,
e como s'alva si ch'est incanida
e non giuto su cucuru nieddu,
Tzeleste mi at a fagher de acheddu
e Nigola mi faghet de guida.
E pro me custu est unu grande onore
mi la passo bene che signore.

30. Mureddu (55'')

Mario non nos trates cun ingannu
oghende sa virtude 'e su chelveddu,
ca deo a ti fagher de acheddu
mi paret un'onore troppu mannu,
apo in dossu un'umile pannu
pro chi epa zentilesa in su faeddu.
Ma canto e ti fato cumpagnia
ma fato unu tantu 'e parte mia.

31. Farina (47'')

A Mureddu iscultalu a s'atenta
ca cantende nde tenet valore
in su chi at nadu Masala ti amenta
in cussa otava perdes sos onores,
sos mannos ti ant leadu a manu tenta
como azudu cheres dae sos minores.
Amentadinde Mureddu cun Farina
non sunu rosas ca bi at ispina.

32. Masala (47'')

In custa gara 'e poesia orale
de fronte a su populu orgolesu,
no apo a esser basciu in su morale
proghì sos annos mi sunt dende pesu,
ma cando mai si che so in mesu
mi tevides trattare gai male.
Eo tratadu bene già mi chelzo
ca manca e dresta ambos bos prefelzo.

33. Mureddu (52'')

Odio sa briga e sa refrega
in su palcu in dogni àteru tretu,
proghì reste in s'umile piega
manifesto s'amore cun s'afetu,
deo li tenzo istima a su collega
lu trato cun su massimu respetu.
Però amentadinde in su futuru
ca debes rispettare tue puru.

34. Farina (48'')

Si a s'esordiu li namos arrima
tando finimos donnia lamentu,
nois chi semus de su palcu in chima
totu in donu est custu turmentu,
ca preparadu ant calchi argumentu
e tra nois non si perdet s'istima.
Ca usu su est dogni poeta
subra su palcu bi cheret sa brulleta.

35. Masala (47'')

Si lu cheres s'esordiu suspesu
a mie puru tocat chi lu fine,
ma in dd'unu tempus passadu e atesu
cantu ti cherzo narrer indovina,
bi tenimis un àteru Farina
cussu fit tiu Antoni su nulvesu.
Chi si est distintu in mesu sos poetes
e tue che issu onore ti fetes.

36. Mureddu (55'')

Siat che issu poeta famadu
diventet famosu unu poete,
et est giustu eo puru chi dilete
e chi nde dia su casu proadu,
penso sa leva 'e su settantasette
chi epat s'argumentu preparadu.
E gai chie iscultat si recreat
e dogniunu una via si leat.

Incomintzu 'e primu tema

1. Farina (sa patria)(1'01")
Zaghì a cantare ana fatu s'invitu
mi peso reu che sardu poeta,
e che capu gara in custu situ
isperende su dovere chi fete,
e in manos leadu apo bigliete
e su bigliete già e fit iscritu.
E pro a mie est mannu s'onore
ca a sa patria li tenzo s'amore

2 .Masala (sa famiglia) (46")
S'esordiu cantadu in bonumore
già l'amos sentza odiu e puntiglia,
de fronte a unu populu signore
e cun dd'unu tenore a meraviglia,
Farina pro sa patria s'amore
a mie ant dadu s'amore a sa famiglia
E mi poto contare fortunadu
ringraziende a chie mi l'at dadu.

3. Mureddu (Deus) (1'01")
S'esordiu oramai ch'est suspesu
ma sighimos sa gara 'e poesia,
e su tema chi prima apo pretesu
como già lu tenzo in manu mia,
devo narrer chi fortunadu sia
o sa fide de su coro ana cumpresu.
Devo narrer in custu tema meu
totu s'amore chi li tenzo a Deu.

4. Farina (56'')

Duncas sa zente già l'at a cumprendere
ca nessununu nde giughet machine,
e si bene ragionamos a fine
deo sa patria chelzo pretendere,
a dogni lacana e donzi confine
tocat a mie a las difendere.
E dae coro bo lu naro aberu
chi custu notte mi intendo fieru.

5. Masala (49'')

Custa festa 'e s'Assunta de ocannu
sa notte paret fintzas in favore,
ma su chi naro deo est sena ingannu
e dogni versu est bellu che fiore,
amentade chi Deu est troppu mannu
e sa famiglia mira già est minore.
Tando m'intendo cuntentu e sodisfatu
ca sa famiglia la tenzo a contatu.

6. Mureddu (59'')

Ma deo cun seraficu candore
oe de resonare fato prou,
ca non lu potu lassare in costou
s'amore pro Deus criadore,
e chie a Deus tenet veru amore
già amat puru su prossimu sou.
E amande a Deus si diletat
amat su sou e s'anzenu rispetta.

7. Farina (54'')

Mureddu già la tenet sa resone
e Masala at afetu a sa famiglia,
però in sos confines ti che pone
pro sa patria sempre ti concilia,
in su Trentinu da cussu istradore
fina a che arrivare in Sicilia.
Deo su rispetu lu pretendo
e totu cantu est deo chi difendo.

8. Masala (51'')

Tue Nigola sa patria l'ama
ma est su tema meu piùs profundu,
su ch'in sa gara l'ant post' in programma
no est aberu a un'àteru segundu,
tenzo amore a babu e a mama
proite mi ant battidu a custu mundu.
Totu pro issos est s'amore meu
non so pensende a patria né a Deu.

9. Mureddu (56'')

Apo su coro turbadu e feridu
non mi as in sa risposta sodisfatu,
si at unu coro in sinu un' individu
sempre a Deu tevet esser gratu,
si ides unu nudu e l'as bestidu
si ides unu famidu e l'as atzatzu.
Su ch'in sa vida faghès a su peus
amenta chi lu ses faghinde a Deus.

10. Farina (56'')

Su patriota est unu puntellu
proghì sugetu siat a su drama,
e de sa patria difendo donzi ama
so deo chi aperzo onzi cancellu,
pensabi s' onore de una mama
si unu fizu tenet coronellu.
E tando aberu est sa meraviglia
chi dat onore finas in famiglia.

11. Masala (49'')

Fina chi tenzo vigores e brios
coraggiu, forza e chi tenzo alenu,
su dovere apo a fagher in pienu
apo a versare su suore a rios,
pro poder sistemare a fizos mios
e gai so unu babu serenu.
Ca sa famiglia mia l'amo tota
non penso a Deu né so patriota.

12. Mureddu (57'')

Ma proite a mie no assegundas
ite nende mi ses in cust'ora,
Santa Chiara at bideas profundas
e ti l'amento in custa dimora,
si nd'at segadu sas tritzas biundas
e las oferit a Nostra Signora.
Sena nde tenner peruna ilgonza
si est pro amare a Deu fata monza.

13. Farina (48'')

Pro Deu non nde chilco cuntierra
pro chi Chiara sa proa l'at fata,
Mureddu chi at s'idea ch'est cumpata
su chi ti naro deo bene aferra,
chie intituladu ti at sa piata
est pro cuddos chi mortos in gherra.
In cussa lastra de granitu frita
calchi cosa già bi l'ant iscrita .

14. Masala (45'')

Gai sabiu canta e arresona
cun su tou poeticu talentu,
Mureddu e Chiara già fit bona
bidu amos su reale isperimentu,
muzere mia de domo est padrona
non si ch'est inserrada in su guventu.
No est monza e muzere si giamada
e faghet bene ca sa famiglia amada.

15. Mureddu (56'')

Ma mantene sa logica vicina
si sa vera rejone l'as cumpresa,
teves pensare a sa sede divina
est de sa vida sa menzus bellesa,
amenta tue Atonia Mesina
a cando unu vile l'at ofesa.
At afrontadu su destinu feu
e ch'est olada pura a ue est Deu.

16. Farina (49'')

Sa patria est su primu fundamentu
proghì Deus ti siat bonu proe,
pro dogni patriota bista atentu
chi isetadu non bi ana a oe,
intituladu li ant su monumentu
e dichiaradu est chi est eroe,
Sos chi in su fronte ant fatu puntiglia
monumentos non faghene a famiglia.

17. Masala (47'')

Atonia Mesina est che viola
pura chi non si agatat sa cumpagna,
ma deo penso a sa famiglia sola
e chelzo chi istet bene in cucagna,
cando unu fizu l'avio a s'iscola
e s'àteru l'avio a sa campagna.
Sa famiglia la scherzo sistemada
e mi paret chi l'apo indovinada.

18. Mureddu (55'')

Lu cumprendes collega s'arrejonu
ca deo ti rispondo puntuale.
pensa chi Deu lu est imortale
e in su chelu lu tenet su tronu,
ca de familia unu babu onu
si faghet de sa rughe su segnale.
Un'omine lu est tando meraviglia
proite amat a Deu e sa famiglia.

19. Farina (49'')

Ambos chi sezis a cuss'ala manca
tue preghende Mureddu resisti
e Mario mai la fetes franca
e sa famiglia ona sempre assisti.
ite naras de Toti a un'anca
e i sa fama'e Cesare Battisti.
Chi dognunu morit che patriota
ca in su fronte ant fatu sa lota.

20. Masala (44'')

Mureddu in palcu ti fichis deretu
e non ti at a mancare s'energia,
ti signas in sa fronte e in su petu
recitas una santa ave maria,
ma deo in sa mesa e in su letu
bi chi so sempre cun muzere mia.
E amitimos chi Deu bi siede
za bi at a essere però non si biede.

21. Mureddu (56'')

Amenta Deus est in dogni tretu
e non solu in su regnu soberanu,
at bisonzu de creere dogni umanu
cantu bi at pregiu bi at difetu,
prega cando ti colcas in su letu
pregas cando ti pesas su manzanu.
Ch'accudit calchi santu a cussa zona
finas morinde faghes morte ona.

22. Farina (46'')

Sas giannas a Deu las aberis
ca cussa est sa manna divina,
però Mureddu àteru non preferis
pro chi contra sies a Farina,
so deo chi apo sos carabinieri
sa polizia e tenzo sa marina.
A contu meu est dogni orizzonte
chi cumando su mare cun su monte.

23. Masala (45'')

In s'amore non bi at odiu e fele
bo lu cunfesso pro sa parte mia,
deo a sa famiglia so fidele
famiglia si nde tenet una ebia,
A s'innotzente canto s'anninnia
e i su sonnu est dulce che i su mele.
No insetto sa manna dae s'aera
e non so in chilca 'e fagher preghiera.

24. Mureddu (56'')

Ma afrontas de sa vida sos peleos
e teves tribagliare in donzi situ,
e suta postu a sos mamentos feos
tando invocas a Deu beneitu,
gai l'ana invocadu sos ebreos
los at liberados da s'Egitu.
Proite a Deu su coro ana apeltu
est falada sa manna in su desertu.

25. Farina (46'')

Piùs de tantu narrer non ti poto
pro chi cussa istoria l'apo intesa,
ma po sa patria Mureddu annoto
de ispuntare fato sa pretesa,
e ischis sa brigata sassaresa
in su bindighi e degheoto.
In su fronte che ruet calchi omine
però difesu l'amos su confine.

26. Masala (48'')

Male ti sunt andende sos afares
cando a sa famiglia ti ribellas,
deo in vida sas oras piùs bellas
la passo cun sos mios familiares,
non che la passo peris sos altares
in sas cheias né in sas capellas.
Ca si amas a Deu male campas
iscudes cascu chi s'aera istampas.

27. Mureddu (56'')

Mario finimila sa lamenta
ca sos morales non benint distrutos,
amare a Deu sa zente est cuntenta
de santidade si godint sos frutos,
e finas de don Bosco ti amenta
chi at fundadu paritzos istitutos.
E de orfanos nde at regortu un'ama
fizos sena babu e sena mama.

28. Farina (45'')

Don Bosco za fit sa mente sagia
pro chi como contat de sos divinos,
e Masala si leat sos caminos
in tempus caldu est in s'ispiagia,
ma amenta chi semos in Barbagia
e contamos sos barbaricinos.
Ca de patriotas ja semos sovranos
ca ogadu foras che amos sos Romanos.

29. Masala (47'')

Però su chelu ch'est tropu in sas puntas
piùs in altu 'e sas àteras cosas,
sas manos mias Tzeleste sunt gallosas
amenta ded salia sunt untas,
ma sunu duas manos operosas
tue invece ses sempre a manos giuntas.
Retzitende sa santa preghiera
chi mi paret sa cosa piùs lizera.

30. Mureddu (55'')

Chie tenet a Deus in su coro
lu at su coro 'e buntade pienu,
in sa vida sua si passat serenu
pienu de bonu sensu e de decoro,
ti debes amentare de Isidoro
s'umile massaju madrilenu.
Chi a Deus preghiat in totue
cun sas manos callosas cant'e tue.

31. Farina (45'')

Mureddu lassa istare s'oratzione
e non ti nalzo chi est cosa maligna,
però pro sa patria ti bi impigna
e tando a mie nde das sa rejone,
l'ischimos sos capos de Sardigna
chi fini Amsicora cun Ospitone.
E dae ora tarda l'amos intesa
chi sa Sardigna l'ant sempre difesa.

32. Masala (44'')

Mureddu ses poeta atrividu
ma ti lu apago deo ogni disizu,
a Isidoro nd'as bogadu a pizu
madrilenu massaju beneidu,
de Maria Turibia maridu
e amenta chi teniat un fizu.
Coltivende sa terra a piaghene
pro amore a su fizu e sa muzere.

33. Mureddu (51'')

A Sidoro sos meritos piùs mannos
si bi los dasa a mie est de cunfoltu,
mai in sa vida unu passu a toltu
no at postu cun sos umiles pannos,
e amenta unu fizu de tre annos
a s'umile Sidoro chi li est moltu.
E narat pianghinde fizu meu
siat fata sa volontade 'e Deu.

34. Farina (46'')

Preghende Mureddu ses apaticu
però como giambamos su discu,
ischimos Sidoro chi fis simpaticu
e sempre pedinde cuddu aiscu,
e torrare ja chelzo a Frantziscu
in cuddu bellu mare adriaticu.
Como ja ch'est in su rennu 'e s'iscuru
però gherradu bi at issu puru.

35. Masala (45'')

Non so inoghe a bos dare cossizos
cun versos dae mente improvvisados,
non ana a esser tantu profumados
però ant candore comente sos lizos
Mureddu amenta chi tenzo ses fizos
bind'at chimbe chi sunu laureados.
E i su sestu faghet su pastore
ma piùs de Deu za lis sapo amore.

36. Mureddu (54'')

Chie amat a Deu no est metzanu
ca est amare a Deu netzessariu,
Daghì ti andat su tempus contrariu
za nde tenet bisonzu donzi umanu,
duos pabas amos tentu in vaticanu
unu est Simacu s'àteru est Ilariu.
Ca aiant sempre a Deus in bidea
ant onoradu sa Sardigna intrea.

37. Farina (46'')

Cun sa famiglia nd'isetas s'ispera
e a Ilariu chilcas sufragiu,
ma de su patriota est su coragiu
chi difendende già fata a manera,
e cantos oe in pellegrinagiu
andande già bi sunu a Caprera.
E caros collegas so siguru
chi santu ana a fagher cussu puru.

38. Masala (45'')

Cuss'amore pro Deu ti avantagia
como chi su momentu est oportunu,
sa vida mia est vida randagia
ca augurare non la chelzo a nisciunu,
peri sos palcos da su chimbant'unu
a sand'e torra viaggia, viaggia.
Mi sacrifico pro sa famiglia mia
non so pensende a Deu, né a Messia.

39. Mureddu (52'')

Ma debes sa Sardigna divertire
e insisti finas cantu durat,
ma chie amata a Deu si assecurat
bellu e serenu un'avvenire,
e chi amat a Deu ja non furat
non bi andat de tzertu a bochire.
Za si distinghet in mesu e sa zente
e si campat sa vida onestamente.

40. Farina (45'')

Ma lassa a Deus in chelu suspesu
pro chi Mureddu meda bi as pregadu,
oe a Orgosolo ses arrivadu
e de orgosolesos sese in mesu,
ischis Gramsci est mesu ghilarzesu
e sa piata li ana intituladu.
Che ghilarzesu leadi su pannu
pro chi a tie est unu onore mannu.

41. Masala (45'')

Caru Farina ci mi sese a dresta
già ses naschidu pro improvvisare,
e cun s'amore a sa patria resta
pro la difendere prontu a gherrare,
ma deo passo dogni die in festa
cun sa chi che apo pigadu a s'altare.
E i sa patria mia non la giamo
piùs l'istimo in vida e piùs l'amo.

42. Mureddu (56'')

Deo non nde fatto de oratziones
proite sos semper a rosariu in manos
ca nde tenent bisonzu sos umanos
su pregare distinghet sas persones.
e de martires degheotto miliones
amenta chi ana mortu sos Romanos.
Ana versadu su sambene issoro
Sunu mortos cun Deus in su coro.

43. Farina (49'')

Cussu fronte lassabilu de sesi
ca a mie mi est toccadu cussu male,
e fieru afronto cussa tesi
ca po sa patria so puntuale,
ischimos Musinu fiat de Thiesi
e mortu est comente generale.
A betzu mannu at bidu sa cundanna
ma ancora li faghent festa manna.

44. Masala (49'')

Farina chi mi sese a i cuss'ala
non ses fetende una figura fea,
ma dae Troia si fuet Enea
ca est sa gherra una disgrascia mala,
benit a Roma antiga s'urbe dea
si che fuit cun su babbu a pala.
E cun su fizu sou a manu tenta
cust'est amore 'e famiglia ti nde amenta.

45. Mureddu (54'')

De amore pro Deu nde so satziu
amo sa religione unica e sola,
tue puru cun megus ti cossola
ca in su chelu ti faghes ispatziu,
de Laconi amentas a S. Ignatziu
e de Gestori a Santu Nigola.
Ch'ana onoradu su sardu terrinu
meda piùs 'e Giuseppe Musinu.

46. Farina (45'')

A Igniatziu dalli sos onores
proghì in chelu che ant postu sos pese,
però sunu de Roma sos valores
caru Mureddu custu ischire tese,
si amos tentu ottanta imperadores
e in su tronu bi ant sette rese.
Caru collega lu debes comprendere
chi fiant pro sa patria difendere.

47. Masala (48'')

Si che andas a s'eterna capitale
su chi ti naro lu isculta Nigola,
asa amore a sa patria nadale
proite patria si nd'at una sola,
ma s'amore paternu filiale
lu devent insegnare in dogni iscola.
Pro totu sos terrenos cristianos
senza mancu leare un'arma in manos.

48. Mureddu (54'')

Ma cussos ite patria ana a difesu
deo ti naro de fronte a sa zente,
apo su coro de amore atzesu
proite verso cun Deu Onnipotente,
invece sos Romanos l'ana ofesu
ana versadu sambene innotzente.
Invece at gherradu Costantinu
cando at bidu su segnu divinu.

49. Farina (48'')

Ma sa patria non tenet ispatziu
sempre apertu est dogni caminu,
tue pensa a pregare su divinu
e dae s'altu iseta su datziu,
ischimos pro sa patria Costantinu
chi gherradu bi at in su Laziu.
E inie gherrende si est postu in zelu
e pro cussa lota como est in chelu.

50. Masala (42'')

Cust'ottada Mureddu dae su coro
già ti la canto serena serena,
sa mama 'e Costantinu fit Elena
e fit muzere de Costanzo Cloro,
at amadu su fizu che tesoro
ca at fatu finas sa tzeraca anzena.
Costantinu pro Deu at fatu tantu
epuru ancora no est mancu santu.

51. Mureddu (52'')

E si cunvertit a sa preghiera
e invocat a Deu beneditu,
cando si est abizadu in cussu situ
sos cristianos chi fint in bisera,
in **oc signun vincis** at bidu iscritu
Costantinu amenta in s'aera
E amende a Deu su silentziu
at postu a sas ordas de Massentziu.

52. Farina (48'')

Si terminamos cun custa puntiglia
e custa parte si faghet finida,
e sa patria siet sempre guida
e pro dogni unu sempre a meraviglia,
e s'idea a Deu mai siat finida
e s'amore bi apat in famiglia.
Ca lu cumprendene in custu paese
ch'in sa vida bi charent tot'as trese.

53. Masala (45'')

Si finimos su tema a i cust'ora
siat pro amore e Deu totu cantu,
in custa festa de Nostra Signora
in Orgosolo faghent a ispantu,
Costantinu at pregadu e no est santu
e nd est dae su chelu a s'ala 'e fora.
Ma Elena sacrificat de continu
pro s'amore a su fizu Costantinu.

54. Mureddu (50'')

Ma si finides bois fino deo
est ora de concruere custu impreu,
ma chie in su coro no at neu
comente lu ido deo za bi creo,
e su mossu de sa uca mi nde leo
pro lu dare a unu fizu meu.
Un'omine mi conto a meraviglia
amo a Deu, sa patria e sa famiglia.

Segundu tema: accompagna il tenore Santu Juanne

1. Farina (*su etzu, ricu e pretendente*) (1'04'')

Finidu su passadu e i su tundu,
su bellu ballu nde amos miradu
aterunu bigliette mi est sortegiadu,
isperende cun s'estru fecundu
ca daghì su tema est su segundu
aterunu a mie nde at toccadu.
Anunziare bi lu devo a sa zente
chi so su etzu e so pretendente.

2. Masala (*sa giovana*) (54'')

Su primu tema gai amos arressu,
e su segundu ponimos in bia
ma custu non mi fit mai sutzessu,
et est sa prima orta in vida mia,
in su sorteggiu mi at cambiadu e sessu
e passo dae Mario a Maria.
E so Maria una pitzinna bella
che nostra Signora Verginella.

3. Mureddu (*giovanu, poberu pretendente*)(1'04'')

Apagare sa ostras sarda brama
sena nde tenner de meritos mannos,
a Deu apo tessidu lodde e fama
l'apo amadu sintzeru sena ingannos,
ma como so unu giovanu 'e vint'annos
orfanu senza babu e sena mama.
Chi conto su piùs poveru ' e su mundu
so cun sos pantalones sena fundu.

4. Farina (54")

Sa sorte mi at postu in afannos
chi contra a mie tenet sa puntiglia,
giaros e lughidos tenzo sos pannos
però mi mancat sa più meraviglia,
oramai sunt settanta chimb'annos
so solu e non nde tenzo de famiglia.
Chilcadu de oe apo una chedda
ma in vaghidu de custa pisedda.

5. Masala (51")

Proseghimos in palcu sa disputa
cun su segundu tema chi ant dadu,
de sa palte chi in manos mi nd'est ruta
già mi poto contare fortunadu,
cun custu bellu tenore atonadu
chi de cantare mi ponet in muta.
Est de Santu Juanne su tenore
chi a su primu no est inferiore.

6. Mureddu (56")

In su coro sas bramas chi tenia
za nde fato sa proa manifesta,
dadu bi at bellu zeniu e simpatia
de unu visu sintzeru e onesta,
l'apo ida de Orgosolo in sa festa
mi so innamoradu de Maria.
Como ti naro t'istimo e ti adoro
proite mi as furadu mente e coro.

7. Farina (1'08")

O Maria ponebilu s'aficu
a m'iscultare ti fato s'invitu,
ca Mureddu est unu putu sicu
est giovanu ma paret mesu fritu,
deo est chi lu tenzo su meritu
bestiamine tenzo e conto ricu.
E a daghì bi at domos cun bestiamine
nessi unu non morit de su fame.

8. Masala (54")

Tue comente cheres mi la giras
ca sas virtudes tuas sunu imensas,
e cantende sa parte che la tiras
ma cun tzertas propostas a las sensas,
si ti che furo su coro non respiras
si ti che furo s'anima non pensas.
Como su coro e sa mente Tzelestinu
non ti che furo e tenelos in sinu.

9. Mureddu (1'01")

O Maria ti gires a sa manca
est de sa vida sa menzus virtude,
e ti naro cun megus ti afianca
sa nostra pretziosa zoventude,
deo non tenzo elvegghes e ne tanca
però la tenzo sa bella salute.
E sa salute est sa menzus belleza
sa zoventude sa menzus richesa.

10. Farina (57'')

O Maria iscultami apena
e de Mureddu sempre bista attentu,
de zoventude est su primu portentu
chi ispetzare podes sa cadena,
deo etza ja tenzo sa carena
ma pitzinnu so in pensamentu.
E si a fiancu tou mi presentu
istabi sigura ti contento.

11. Masala (50'')

Si non tenes sa tanca né i sa chedda
tando ses Tzelestinu in carestia,
da un'oiada a sa conca mia
una e s'àtera tritza apo niedda,
sa bona parte mi jamana Maria
bind'at pagos chi mi jamant mariedda.
Ma nessunu mi giamat mariola
si comente non so amorajola.

12. Mureddu (55'')

Deo conto unu zovanu de onore
però de mi comprenderejà t'imploro,
proite a tie juto intro su coro
ses pro me tue s'unicu fiore,
deo a tie ja ti giamo amore
deo a tie ti giamo tesoro.
Ti juto in pensamentu notte e die
deo tia a morrer pro amare atie.

13. Farina (54'')

Furcheta non tenet né cucciari
iscuru mi paret s'orizzonte,
a dogni intemperia li paro fronte
e apo salute e tenzo inari,
domos apo in su mare e in su monte
e viaggiamos sempere in Ferrari.
Ma si cun issu chilcas su presente
già viaggiades a caddu 'e molente.

14. Masala (49'')

Nde tenes in su monte e in su mare
tota est sa tua sa proprietade,
ma a ti narrer sa santa veridade
non mi piaghet mancu a t'iscultare,
como che sese in sa terza edade,
comente faghes a pigare a s'altare.
Daghi bi at gradinos e iscalas
e tue si che pigas non nde falas.

15. Mureddu (52'')

Farina cun megus totu ilgiari
deo za l'isco chi ses possidente,
deo in vece so nulla tenente
za non tenzo né tanca né dinari,
tue ses nande chi as sa Ferrari
e su motore jà zughet potente.
Ma cudda machinedda de s'amore
ja non girat piùs su motore.

16. Farina (53'')

Maria chi lu ses a s'aurora
mira so deo una meraviglia,
sos annos fatende mi sunt puntiglia
ma pro cussu tue non ti addolora,
ca si deo mi leo sa pastiglia
sa carrela mi la fato ancora.
E cun sa pastiglia e cun s'impignu
tenner podimos su pitzinnu.

17. Masala (48'')

A malapena ti fichis deretu
tue tenes bisonzu de riposu,
mancari sias che ricu famosu
chi atzete non sias in s'isetu,
ma daghè mi che colco a su letu
mi che devo colcare cun s'isposu.
In su fiore de sa gioventura
non mi che colco cun dd'una vetura.

18. Mureddu (58'')

Non teves mai arrivare a tantu
ca so deo sa zusta cumpanzia,
si Zuseppe betzu e de ispantu
e custu ispiegare ti cheria,
a fecondare sa Vergine Maria
si est abasciadu s'Ispiridu Santu.
Si de Nigola diventas s'isposa
già ti sutzeddit sa matesi cosa.

19. Farina (59'')

Mureddu lu cunfirmo in custa sagra
cun sas pagas folzas chi apo loto,
mira figura non nde fato magra
caru collega, bene ti lu annoto,
ca deo mi nde leo su viagra
e apo a parrer unu givanoto.
E in su letu so a prima gala
totu sos annos che ponzo a un'ala.

20. Masala (49'')

Tzelestinu ses teteru che fusu
non ti mancat sa forza e s'apetitu,
ma lassalu a Zuseppe e a Zesusu
su babu cun su fizu beneitu
a tie girat su de fundu a susu
non ti che falat nemancu unu citu.
Semper in chilca 'e ti fagher isposu
famidu ispiantadu e priuegosu.

21. Mureddu (55'')

Ma de mi criticare finindela
menzus s'argumentu a filu jughe,
chi so poveru l'ischint in carrela
ca so che Gesù Cristu postu in rughe,
ma unu si at atzesu sa candela
pro poder bider unu pagu 'e lughe.
Ma dispetosu si pesat su entu
e tando cussa sorte no at tentu.

22. Farina (53'')

Custa Mureddu non l'apo cumpresa
e ripitimila in veridade,
che pitzinnu as tue facultade
e de fortzas nde idimos sa resa,
reu non bistas a sa debilesa
pro chi sias in pitzinna edade.
Mi chi su fame ti est afintinde
e de su fame mi pares morinde.

23. Masala (50'')

Nigola de insistere nd'as de aiu
in custu palcu de linna e de ferru,
deo so una rosa in birde maju
nemancu in fritu non chilco cuerru,
invece tue ses fedale 'e iaju
e ses fritu comente in s'ierru.
Sese a unu passu dae sa losa
e tue puru in chilca 'e isposa.

24. Mureddu (56'')

O Nigola a ti bider za ses calidu
pares unu cadditu desulesu,
e poi si cumprendet dae tesu
chi est a cultzu a ti mancare s'alidu,
e dae chintzu in bassu ses invalidu
non ti adurat reu mancu presu.
Si non fichis, non retzes e ne prantas
cun custu amore a mi la piantas.

25. Farina (59'')

Pro sos annos già mantenei apretzu
però Mureddu za non so decàidu,
ca tota sa vida so avetzu
chi abertu l'agatat calchi aidu,
est beru chi Nigola contat betzu
però amenta chi no est malàidu.
Ca fagher bider chelzo a sa signora
mancari betzu bi la fato ancora.

26. Masala (52'')

Como a crese bessidu mesu fora
e bista attentu Nigola Farina,
in custa tua patria e dimora
e cosas piùs bellas mi cumbina,
e aite giamadu mi as signora
si so aiana e so signorina.
Ma tue settanta anno asa in susu
si bidet chi ses betzu e ses confusu.

27. Mureddu (50'')

Si la rejonas gai l'as compresa
deo ti ponzo s'aneddu in su didu,
pro chi siat poberitu un'individu
est sa vida nostra una bellea,
ti debes abratzare unu maridu
non teves abratzare sa richesa.
De sa richesa faghende de mancu
si omine non tenes a fiancu.

28. Farina (56'')

Fortzas non tenzo ma tenzo su briu
e a Maria li do su cunfoltu,
in piena ja non so su riu
però ancora già lu abo s'ortu,
Mira Mureddu deo non so mortu
tenzo s'alenu e conto iu.
Custu ti at a piaghene o non piaghene
so cunvintu cun issa a bi la faghene.

29. Masala (49'')

Como jà l'as intesu a Mureddu
cussa ottava chi at improvvisadu,
ca Nigola in s'edade est avanzadu
e issu est in s'edade giovaneddu,
e nachi mi regalat unu aneddu
ma si est unu giovanu ispiantadu.
Non tenet dinari a lu pagare
comente faghet a lu comporare.

30. Mureddu (52'')

Maria non mi ponzas in afannu
isculta a amie pro s'amore 'e Deu,
apo in dossu giovanile pannu
e ses pro me tue s'unicu recreu,
ca tenzo in domo un'aneddu mannu
chi mi at regaladu nonnu meu.
Bene regortu da lotana die
e como deo lu regalo a tie.

31. Farina (51'')

Ma ite nende ses caru Mureddu
pro chi sanbene as in s'arteria,
su futuru cun tegus est nieddu
ca mancat de inari sa materia,
pro chi sias briosu e giovaneddu
totu sa vida ja sese in miseria.
Ma si a Farina li restas costante
Maria as a biver che benestante.

32. Masala (51'')

So timide chi mi sutzedat dannu
lu confesso cantende a s'ala ereta,
de sa Madonna in sa festa 'e ocannu
ses Mureddu in miseria cumpleta,
ma nachi tenes unu domo mannu
e i sa domo est una pinneta.
Si non bi at letu mannu e letinu
e comente dromimos zelestinu.

33. Mureddu (53'')

O Maria rifletas un'iscuta
prite comiter non nde cherzo abusu,
duos de si amare tenent usu
ca s'amore est prelibada fruta
ma da chi tue ti che colcas suta
e deo poi mi che colco susu.
e podimos bistare a vicinu
istamos bene in dd'unu lettinu.

34. Farina (50'')

Si s'istintu mi faghet de guida
da issa non mi chelzo dividere,
e afrontare chelzo custa isfida
in custa fida già la chelzo idere,
ma si est pro la fagher congruida
como Maria ti teves detzidere.
E ti prego chi bi decidas notesta
si bi andas a manca o a dresta.

35. Masala (51'')

Tue Nigola ses betzu che ijaju
e as de ti cojare pensamentu,
ma ricos che atie unu paiu
ja non che ndat in su Gennargentu,
però andamos in antis a su notariu
e mi faghes su bene in istrumentu.
Daghì mi agato s'istrumentu in manos
podimos isposare cras manzanu.

36. Mureddu (54'')

Ma tue ses aberu mariola
non cumprendes de vida su valore
deo a tie apo giuradu amore
e pro me già esistis tue sola,
ma si che pigas a s'altare mazore
tue pro ti isposare cun Nicola.
Andat male sa festa nutziale
ca faghes da s'altare a funerale.

37. Farina (53'')

Su chelveddu meu già est idoneu
chi non bind'ada de decadimentu,
e si faghimos como su matrimoniu
ti naro Maria so cuntentu,
si onoramos cussu sacramentu
est totu a issa meu patrimoniù.
Ti at a faghene a tie piaghene
de cussu matroniu ses sa mere.

38. Masala (53'')

Tzeleste chi ti apretze ses apitu
ma no isco de me si sias dignu,
però non chelzo no ogare s'impignu
sa veridade confesso subìtu,
non solu 'e mi pedirer unu asitu
ma non mi as dadu mancu unu carignu.
Comente fato a mi leare a tie
cando tue ses una boccia 'e nie.

39. Mureddu (56'')

Ma deo de atie conto dignu
proghì lu sia unu nulla tenente,
de ti amare mi ponzo a impignu
pro me esistis tue solamente,
unu asu, unu abratzu unu carignu
como ti do de fronte a custa zente.
E la faghimos sa briga finida
e nos amamos pro totu sa vida.

40. Farina (56'')

De s'abratzu como non bi at bisonzu
proghì a mie mi as nadu nono,
però Maria cun tegus arrejono
chi a s'artare ti do su lionzu,
in campanile sas campanas sono
e ti fato puru 'e testimonzu.
E dae coro bos naro in veridade
apedas fortuna cun felicidade.

41. Masala (50'')

Ma bisonzat a narrer su chi est
non mi piaghet a restare sola,
ca est sa solitudine una peste
piùs grave de sa febra ispagnola,
e tando mi che leo a Tzeleste
tue tene passentzia Nigola.
E a tie sa die de s'isposonzu
ti amos a invitare a testimonzu.

42. Mureddu (51'')

Mi at nadu de amore sos faeddos
sa piùs bella de totu sas bellas,
in pes de sos altares e cappellas
como nos cambiamos sos aneddos,
tue Nigola nos das chentu procheddos
e nos regalas nessi chentu itellas.
E poi custu populu devotu
a sa festajà l'invitamos totu.

Duinas

Farina (11'')

Lassade sos invitos a un'ala
pesade e faghide sa duina.

Masala (10'')

De sa madonna est sa festa divina
e no amos a fagher fine mala.

Mureddu (13'')

Ma totu sa virtude chi amos a pala
ja l'at compresa sa zente vicina.

Farina (10'')

Fit fantasia non fit realtade
torramos a su zustu in veridade.

Masala (9'')

Inoghe est realtade e fantasia
tando a Nigola li damos resone.

Mureddu (11'')

Però s'opera ostra cun sa mia
est poetica vera espressione.

Farina (10'')

Est zustu deo non l'apo unione
però non so e mai in s'agonia.

Masala (7'')

Proghì bi at notte chi si dromit sa zente
si non bi at umu tema divertente.

Mureddu (10'')

De si chi l'eana bona cumpagnia
però Nigola la tenet s'edade.

Farina (10'')

Però nontesta la prego a Maria
est zustu cussu ed est sa realtade.

Masala (7'')

Pro ti cojare in antzianidade
non ti nde chilches una fedale mia,

Mureddu (10'')

Daghì se dinnu fizu 'e s'Ipocrene
cun sa cumpanza cantas più bene.

Farina (9'')

Ma non isco si est su Deus Divinu
o su chi narant chi est su destinù.

Masala (11'')

Miraculos dae nois non si isperede
ma unu pagu 'e totu bei cheret.

Mureddu (13'')

Pregas su destinù chi si averet
e sa chi ti piaghet chi s'ischerede.

Farina (7'')

Bi penset dae chelu sa reina
pro Masala, cun Mureddu e Farina.

Masala (13'')

Chi bi pensat dae chelu sa reina
pro chi deo non mi morza signorina.

Mureddu (9'')

Issa ti salvet dae male e dae dannu
e menzus chi ti molzas a betzu mannu.

Farina (24'')

Tando cantamos una battorina,
penset Maria cun s'onnipotente
e agiudare potzat custa zente
mai in vida chi nde lene meighina,
gai cantamos una battorina.

Masala (24'')

Tando cantamos cussa battorina,
non pensedes chi m' istrache o mi afanne,
cun su tenore de Santu Juanne
resisto finu a ora matutina,
tando cantamos una battorina.

Mureddu (34'')

A la cantamos una battorina,
sunt de sa vida sas oras lietas
issos acumpanzende sos poetas
paret chi apant sa musica divina,
a la cantamos una battorina.

Farina (32")

Tando cantamos una battoretta,
Maria sa fama chi as ispaltu
beneighe a custa zente dae s'altu
e dogni ora chi la passent lieta,
gai cantamos una battoretta.

Masala (24")

Tando cantamos una battoretta,
Orgosolo est sa idda 'e sos tenores
e de poetas improvvisadores
e de pinna tentu at calchi poeta,
tando cantamos una battoretta.

Mureddu 50.23 50.57

A la cantamos una battoretta,
Orgosolo de Farina ses fiera
ca est giamadu in sa Sardigna intera
su veru mastru 'e sa rima perfetta,
a la cantamos una battoretta.

Farina (26")

Tando cantamos una noitola,
sos elogios a un'ala pianta
at tentu a Zoppo isposa cun Barranca
in su palcu non bi est solu Nicola,
gai cantamos una noitola.

Masala (26'')

Tando cantamos una noitola,
in sos palcos cantende a poesia
fetas longa carriera che i sa mia
però chi non la fines a sa sola,
tando cantamos una noitola,

Mureddu (34'')

A la cantamos una noitola,
si semos poetas de altu gradu
su chi podimos dare lamos dadu
ma nessi de su pagu ti consola,
a la cantamos una noitola.

Farina (27'')

Tando cantamos una paesana
Orgosolo sempre sias cuntentu
donzunu in vida tochet annos chentu
cun benessere allergia e sana,
gai cantamos una paesana.

Masala (28'')

Tando cantamos una paesana,
Orgosolo est una idda ospitale
e in palcu cantemus bene o male
su chi nos ant promissu no lu dana
Tando cantamos una paesana.

Mureddu (26'')

A la cantamos una paesana
bos apaghet bramas e disizos
sonet pro isposalitzios e battizos
pro funerale non sonet campana,
a la cantamos una paesana.

Farina (26'')

Tando cantamos una furistera
che Orgosolo in totu sa zonas
sonent sas campanas pro cosas bonas
isventolet pro bonu sa bandiera,
tando cantamos una furistera.

Masala (24'')

Tando cantamos una furistera,
ti auguro de gara a sa finida
chi epas salute ona e longa vida
e fetas in su palcu carriera,
Tando cantamos una furistera.

Mureddu (23'')

A la cantamos una furistera
deo Nigola auguro como a tie
chi ti potzas mezorare dogni die
e a Mario chi lu fetas a bisera,
a la cantamos una furistera.

Farina (25'')

Tando cantamos una buchistriglia,
pro Massa bi lu ponzo su votu
però miminende est su fiotu
aumentende non bi est sa famiglia,
tando cantamos una buchistriglia.

Masala (25'')

Tando cantamos una bruchistriglia,
chi enit dae poi de sa furistera
cando Nigola mi faghet a bisera
che siat Mureddu in s'ultima mobiglia,
tando cantamos una bruchistriglia

Mureddu (25'')

A la cantamos una buchistriglia,
che semus isparide 'e dogni zona
e penso ite pecadu s'Elicona
non fagher fizos che i sa coniglia,
a la cantamos una buchistriglia.

Farina (27'')

Tando faghimos una tarantella,
nontesta de sa festa est s'initziu
ispero bonu diedas giuditziu
e chi sa festa li prosigat bella,
gai cantamos una tarantella.

Masala (25")

Tando cantamos una tarantella
sa natura mi at dadu custa dote
e cantos verso cantadu apo istanote
bos diat gratzias Maria Verginella,
tando cantamos una tarantella.

Mureddu (36")

a la cantamos una tarantella,
chi tochedas de gioia dogni punta
e deo prego sa Vergine Assunta
bos beneigat dae sa cappella,
e si finidi cun custa tarantella.

Farina (31")

tando finimos cun sa tarantella
Maria chi de chelu ses in susu
tue chi sa mama ses de Gesusu
beneighe de Orgosolo sa parentella,
e la finimos cun sa tarantella.

Masala (20")

Tando finimos cun sa tarantella,
Maria ca est sa mama de Gesusu
de su regnu tzeleste dae susu
bos siat de guida e de istella,
Tando finimos cun sa tarantella.

Mureddu (22'')

A la cantamos una tarantella,
Maria ca in sinu as uno coro
ponzas paghe e amore in domo insoro
sa vendita e s'odiu che cancella,
e si finit cun custa tarantella.

Farina, soneto (3'14")

Su bindighi de austu ses Assunta
Maria a su rennu de su chelu,
adornada cun su candidu velu
s'istella piùs manna si est agiunta.

Ses reina de su chelu in punta
chie cun tristura e cun zelu
invochende sunu a manu giunta
salvalos dae piaga e d'anelu.

In dogni abitu lu sies vicina
invochende ti sunu dae su coro
cun afetu istima e amore.

Poderosa 'e sa manu divina
che a totu deo già t'imploro
allevia de pena su dolore.

E sa paghe chi regnet in famiglia
perdona puru chi de ogni isbagliu
ogni murrunzu e ognia puntiglia.
onzunu a piaghene su tribagliu
sos de baranta cun sos de trint'annos
chi organizadu ti ant sa festa
cun impignu, suore e fadiga
e beneighe custa zente amiga.
Apagabis s'insoro richiesta
ch'in vida mai nde apant dannu,
cust'umile cantu terminende
dae coro bos prego cun fide,
chi sos isballios mi siant perdonende
faghide bona festa e prosighide.

Masala, soneto (3'40'')

Maria fiza 'e Anna e Giuachinu
de s'istirpe 'e Davide discendente,
de Gerico sa rosa 'e su giardinu
chi as profumadu totu s'oriente,

Capolavoro de Deus Onnipotente
cun virtudes in cara e in su sinu,
at batidu a Cristos a su terrinu
pro redimere e salvare sa zente.

Intrende a su chelu dae fora
ti riverint e faghene milli inchinos,
intonant una musica sonora.

Sos Cherubinos cun sos Serafinos
e ti incoronant reina e signora
messaggeris e custodes sunt vicinos.

E i como Maria Nazarena
cun sa tua manu aberta chi as santa
beneighe a Orgosolo tota canta.
Dogni domo 'e grazias la piena,
de ogni animale cun dogni pianta
lis beneighe in sa campagna amena.
De vida longa godana e serena
comente isperant, bramana e disizant,
sos chi ocannu sa festa ti organizant
cun programa religiosu e tzivile,
deo fino s'iscena mia umile
e sia in dogni errore perdonadu
e grazie ca mi azis iscultadu
Però ringratzio a Nostra Signora.

Assistidu mi at issa puru ancora
da sa sua divina residentzia
bos lasso cun istrinta e manu dresta,
sighidebos a fagher bona festa
e bona note e bona permanentzia.

Mureddu, soneto (4'01'')

Sa santa de sas santas beneida
de sas sette piagas dolorosas,
teviat passare a menzus vida
sena connoscher oras afannosas.

Maria santamente si est dromida
un dd'unu profumadu lettu 'e rosas
inie fit sa dosina riunida
cun trumas de anghelos festosas.


Cantende sos innos de recreu
sena bi aere iscenas de piantu
ca fit diletu su divinu avvisu.

Sa mama s'isposa fiza 'e Deu
s'anima, su sou corpus santu
bolat serenamente in paradisu.

E como dae inie epas detzisu
de dare azudu a custa brava zente
non reste pro nessunu indifferente
appaga ogni disizu e dogni brama.
Ca de s'umanidade ses sa mama
isculta 'e fizos tuos su lamentu,

faghe donzunu serenu e cuntentu
potat godere in sa terrena vida,
Cun sa familia sua sempre unida
da lis fortuna, salute e richesa,
sa bona risultada in donzi impresa
epant meritos cun onores mannos,
E custa festa a piùs de chent'annos
sanos comente oe la festade,
a mie sos errores perdonade
e bos ringratzio de sa richiesta,
onoradu de tanta preferentzia,
sighide tot avida sempre in festa
e adiosu e bona permanentzia.

Stampa a cura dell'Associazione Culturale Poetas Improvvisadores
Finito di stampare NOVEMBRE 2008



Trascrizione e correzione curata dai
soci dell'Associazione con la
supervisione di
Mura Giovanni Antioco